

**Broj: 01-07-198-86/10**  
**Mostar, 21.07.2010. godine**

Na osnovu člana 14, člana 15. i člana 50. Zakona o električnoj energiji („Službene novine Federacije BiH“ broj 41/02, 24/05, 38/05, 61/09), člana 12. stav (1) i člana 14. stav (1) Statuta Regulatorne komisije za električnu energiju u Federaciji Bosne i Hercegovine („Službene novine Federacije BiH“ broj 13/04), člana 31. stav (2) i člana 37. stav (3) i člana 58. Poslovnika o radu FERK-a („Službene novine Federacije BiH“ broj 59/04) i članova 40.-52., člana 56, i člana 71. Pravilnika za tarifnu metodologiju i tarifne postupke („Službene novine Federacije BiH“ broj 45/05), te odluka Državne regulatorne komisije za električnu energiju - DERK broj 04-28-5-367-42/09, broj 04-28-5-348-78/09 i broj 04-28-5-348-79/09 od 27.04.2010. godine („Službene novine Federacije BiH“ broj 28/10) i Rješenja Regulatorne komisije za električnu energiju u Federaciji Bosne i Hercegovine broj 07-02-1592-82/25/09 od 21.07.2010. godine, broj 07-02-1593-73/26/09 od 21.07.2010. godine i broj 01-07-1311-91/09 od 21.07.2010. godine, Regulatorna komisija za električnu energiju u Federaciji Bosne i Hercegovine – FERK je 21.07.2010. godine na IX. redovnoj sjednici donijela

## **O D L U K U**

**o tarifnim stavovima za prodaju električne energije nekvalifikovanim (tarifnim) kupcima  
Javnog poduzeća „Elektroprivreda Hrvatske zajednice Herceg Bosne“ dioničko društvo  
Mostar**

### **Član 1.**

Ovom odlukom utvrđuju se tarifni stavovi za prodaju električne energije za nekvalifikovane (tarifne) kupce Javnog poduzeća „Elektroprivreda Hrvatske zajednice Herceg Bosne“ dioničko društvo Mostar.

### **Član 2.**

(1) Tarifni stavovi za nekvalifikovane (tarifne) kupce po kategorijama i grupama potrošnje određeni su u zavisnosti od troškova proizvodnje, nabavke, distribucije i snabdijevanja električnom energijom, te troškova prenosa i rada NOS-a, uključujući i troškove usluga sekundarne i tercijarne regulacije (po odlukama DERK-a broj 04-28-5-367-42/09, broj 04-28-5-348-78/09 i broj 04-28-5-348-79/09 od 27.04.2010. godine) koje te kategorije i grupe potrošnje stvaraju svojim načinom i vremenom korištenja električne energije, uvažavajući načelo postupnosti promjena.

(2) Tarifni stavovi za prodaju električne energije za nekvalifikovane (tarifne) kupce Javnog poduzeća „Elektroprivreda Hrvatske zajednice Herceg Bosne“ dioničko društvo Mostar s primjenom od 01.08.2010. godine su:

TARIFNI STAVOVI ZA NEKVALIFICIRANE (TARIFNE) KUPCE													
TARIFNI ELEMENTI	JEDINICA MJERE			Kupci izravno priključeni na prijenosnu mrežu	SREDNJI NAPON			NISKI NAPON					
		SEZONSKI	DNEVNI		110 kV	35 kV	10 kV	KUĆANSTVA		OSTALA POTROŠIJA			JAVNA RASVJETA
								I tar grupa	II tar grupa	I tar grupa	II tar grupa	III tar grupa	
0	1	2	3	4	5	6	7	8	9	10	11	12	
MJERNO MJESTO KUPCA	KM			20,00	20,00	20,00	1,90	1,90	20,00	5,20	5,20	1,90	
OBR. SNAGA	kMVA/mjesec	VIŠI		26,46	23,09	28,51	6,57	6,57	20,74	20,74	20,74	1,72	
		NIŽI		20,35	17,76	21,93	5,05	5,05	15,95	15,95	15,95	1,32	
AKTIVNA ENERGIJA	pt/kWh	VIŠI	VEĆI	10,23	9,65	12,46	13,32	16,65	19,37	28,17	22,53	20,83	
			MANJI	5,12	4,83	6,23	0,00	8,33	9,69	14,08	0,00	0,00	
		NIŽI	VEĆI	7,87	7,42	9,58	10,25	12,81	14,90	21,67	17,33	16,02	
			MANJI	3,94	3,71	4,79	0,00	6,40	7,45	10,83	0,00	0,00	
PREKOMJERNO PREUZETA REAKTIVNA ENERGIJA	pt/kvarh			1,00	2,14	2,68	0,00	0,00	3,22	0,00	0,00	0,00	

### Član 3.

U tarifnim stavovima iz člana 2. ove odluke nije ukalkulisan iznos poreza na dodatu vrijednost, za koji Javno poduzeće „Elektroprivreda Hrvatske zajednice Herceg Bosne“ dioničko društvo Mostar ima obavezu posebno ga evidentirati na svakom pojedinačnom računu kupca.

### Član 4.

- (1) Viša (zimski) sezona traje od 01.01. do 28/29. 02. i od 01.11. do 31.12.
- (2) Niža (ljetna) sezona traje od 01.03. do 31.10.
- (3) Veći dnevni tarifni stavovi primjenjuju se od 7:00 do 13:00 h i od 16:00 do 22:00 h, tokom zimskog računanja vremena.
- (4) Manji dnevni tarifni stavovi se primjenjuju od 0:00 do 7:00 h, od 13:00 do 16:00 h i od 22:00 do 24:00 h, tokom zimskog računanja vremena, te nedjeljom.
- (5) Veći dnevni tarifni stavovi se primjenjuju od 8:00 do 14:00 h i od 17:00 do 23:00 h, tokom ljetnog računanja vremena.
- (6) Manji dnevni tarifni stavovi se primjenjuju od 0:00 do 8:00 h, od 14:00 do 17:00 h i od 23:00 do 24:00 h, tokom ljetnog računanja vremena, te nedjeljom.
- (7) Omjer između više i niže sezone je 1,3:1, po tarifnim elementima aktivna električna energija i obračunska snaga, dok je omjer većih i manjih dnevnih tarifnih stavova 2:1 po tarifnom elementu aktivna električna energija.

### Član 5.

(1) Kategorije potrošnje su sljedeće:

- a) kupci koji električnu energiju preuzimaju na 110 kV naponu i višem
- b) kupci koji električnu energiju preuzimaju na 35 kV naponu
- c) kupci koju električnu energiju preuzimaju na 10(20) kV naponu
- d) domaćinstva, koja električnu energiju preuzimaju na 0,4 kV naponu
- e) ostala potrošnja, koja električnu energiju preuzima na 0,4 kV naponu
- f) javna rasvjeta, koja električnu energiju preuzima na 0,4 kV naponu.

### Član 6.

Kupcima koji električnu energiju preuzimaju na 110 kV naponu i višem, 35 kV naponu i 10 (20) kV naponu, obračunava se izmjerena aktivna električna energija, vršna snaga izmjerena u vrijeme primjene većih dnevnih tarifnih stavova (obračunska snaga), prekomjerno preuzeta reaktivna električna energija i mjesečna naknada po mjernom mjestu kupca.

### Član 7.

(1) Grupe unutar kategorije potrošnje domaćinstva su:

- a) I. tarifna grupa, kupci koji posjeduju jednotarifno ili dvotarifno brojilo bez uklopnog sata ili nekog drugog uređaja za upravljanje tarifom,
- b) II. tarifna grupa, kupci koji posjeduju dvotarifno brojilo s uklopnim satom ili nekim drugim uređajem za upravljanje tarifom.

(2) Kupcima I. i II. tarifne grupe iz ovog člana, obračunava se izmjerena aktivna električna energija, 1 kW obračunske snage i mjesečna naknada po mjernom mjestu kupca.

### Član 8.

(1) Grupe unutar kategorije ostala potrošnja su:

- a) I. tarifna grupa, kupci priključeni na 0,4 kV napon, koji nisu domaćinstva niti javna rasvjeta, imaju vršno opterećenje iz elektroenergetske saglasnosti veće ili jednako od 23 kW i istu ne može mijenjati i prelaziti u neku drugu tarifnu grupu,
- b) II. tarifna grupa, kupci priključni na 0,4 kV napon, koji nisu domaćinstva niti javna rasvjeta, imaju vršno opterećenje iz elektroenergetske saglasnosti manje od 23 kW i posjeduju dvotarifno brojilo s uklopnim satom ili nekim drugim uređajem za upravljanje tarifom,
- c) III. tarifna grupa, kupci priključni na 0,4 kV napon, koji nisu domaćinstva niti javna rasvjeta, imaju vršno opterećenje iz elektroenergetske saglasnosti manje od 23 kW i posjeduju jednotarifno brojilo ili dvotarifno brojilo bez uklopnog sata ili nekog drugog uređaja za upravljanje tarifom.

(2) Ukoliko ni Javno poduzeće „Elektroprivreda Hrvatske zajednice Herceg Bosne“ dioničko društvo Mostar ni krajnji kupac ne posjeduju kopije izdate elektroenergetske saglasnosti, tada ostvarenje vršnog opterećenja iz prethodnog perioda određuje pripadnost određenoj grupi unutar kategorije ostala potrošnja.

(3) Kupcima I. tarifne grupe iz ovog člana, obračunava se izmjerena aktivna električna energija, vršna snaga izmjerena u vrijeme primjene većih dnevnih tarifnih stavova (obračunska snaga), prekomjerno preuzeta reaktivna električna energija i mjesečna naknada po mjernom mjestu kupca.

(4) Kupcima II. i III. tarifne grupe iz ovog člana, obračunava se izmjerena aktivna električna energija, 1 kW obračunske snage i mjesečna naknada po mjernom mjestu kupca.

#### Član 9.

Kupcima iz kategorije potrošnje javna rasvjeta obračunava se izmjerena aktivna električna energija, 1 kW obračunske snage i mjesečna naknada po mjernom mjestu kupca.

#### Član 10.

Javno poduzeće „Elektroprivreda Hrvatske zajednice Herceg Bosne“ dioničko društvo Mostar obavezno je tarifne stavove iz ove odluke učiniti dostupnim svim nekvalifikovanim (tarifnim) kupcima.

#### Član 11.

(1) Tarifni stavovi propisani Odlukom FERK-a o tarifnim stavovima za prodaju električne energije nekvalifikovanim (tarifnim) kupcima Javnog poduzeća „Elektroprivreda Hrvatske zajednice Herceg Bosne“ dioničko društvo Mostar od 29.01.2008. godine („Službene novine Federacije BiH“ broj 6/08) prestaju se primjenjivati 31.07.2010. godine.

(2) Ova odluka stupa na snagu danom donošenja, te se objavljuje na oglasnoj tabli FERK-a, web stranici FERK-a, a dispozitiv ove Odluke i u Službenim novinama Federacije BiH.

### O b r a z l o ž e n j e

U skladu sa članom 14. i članom 15. Zakona o električnoj energiji, FERK je uz ostalo, nadležan za utvrđivanje tarifnih stavova za korisnike distributivnih sistema i tarifnih stavova za nekvalifikovane kupce, kao i za zaštitu prava kupaca, elektroprivrednih društava za distribuciju i proizvođača električne energije, te nadgledanje odnosa u elektroenergetskom sektoru i regulisanje kvaliteta usluga na svim nivoima, kao i tarife i naknade koje se plaćaju na monopolske usluge u distribuciji, imajući u vidu interese i potrebe svih korisnika za snabdijevanje električnom energijom.

Član 49. istog pravilnika propisuje kako tarifni stavovi predstavljaju jedinične cijene za tarifne elemente utvrđene tarifnom metodologijom za svaku kategoriju i grupu potrošnje, te da se razlikuju dnevni tarifni stavovi, sezonski tarifni stavovi, tarifni stavovi u zavisnosti od nivoa potrošnje (blok tarifa) i tarifni stavovi u zavisnosti od vremena trajanja vršnog opterećenja, kao i da FERK posebnom odlukom odobrava i proglašava važećim tarifne stavove po završetku tarifnog postupka.

Član 51. stav (1) Pravilnika za tarifnu metodologiju i tarifne postupke propisuje da tarifni kupci računom za električnu energiju plaćaju cijenu koja pokriva sve troškove sistema, koji su nastali kako bi se osiguralo kontinuirano napajanje električnom energijom. Ta cijena uključuje sljedeće troškove:

- a) troškove proizvodnje i/ili nabavke električne energije,
- b) troškove prenosa i NOS-a
- c) troškove distribucije,
- d) troškovi snabdijevanja.

Članom 56. ovog pravilnika, uz ostalo, je propisano kako je diskreciono pravo i ovlaštenje FERK-a razmotriti i potvrditi sve troškove i prihode dostavljene kao podrška predloženim tarifama te prihvatiti, odbiti ili prilagoditi bilo koju stavku koja nije opravdana, razmotriti i potvrditi cjelokupna sredstva koja su predložena da budu dijelom osnove regulisanih sredstava i prihvatiti, odbiti ili prilagoditi vrijednost bilo kojeg od tih sredstava, prihvatiti, odbiti ili prilagoditi svaku veličinu ili analizu korištenu za proračun predložene tarife, i prihvatiti predložene tarife ili ih prilagoditi na odgovarajući način.

Članom 71. istog pravilnika propisano je kako će FERK, uvažavajući načelo postupnog uvođenja međunarodno prihvaćene regulatorne prakse i postupnog uvođenja općeprihvaćenih međunarodnih standarda u tarifnom postupku, voditi računa o izbjegavanju naglih i velikih promjena tarifa u prelaznom periodu, kao i o postupnom ukidanju unakrsnih subvencija između elektroprivrednih djelatnosti, kategorija i grupa potrošnje, kao i o postupnosti pri odobravanju stope povrata na vlasnički kapital, te da postupnost u primjeni tarifne metodologije u prelaznom periodu podrazumijeva i postupnost u eventualnim izmjenama tarifa, koje će na kraju prelaznog perioda u potpunosti biti zasnovane na opravdanim troškovima.

FERK je 05.11.2009. godine donio Odluku o provođenju četvrtog tarifnog postupka broj 01-07-1311-02/09, kojim je pokrenuo na svoju inicijativu četvrti tarifni postupak za Javno poduzeće „Elektroprivreda Hrvatske zajednice Herceg Bosne“ dioničko društvo Mostar i to radi utvrđivanja potrebnog prihoda za djelatnost snabdijevanja električnom energijom I. reda (nekvalifikovani (tarifni) kupci), na godišnjem nivou, uključujući i trošak nabavke električne energije za potrebe nekvalifikovanih (tarifnih) kupaca, te kojom je odredio potrebnu dokumentaciju i rok za podnošenje potrebnih dokumenata od Javnog poduzeća „Elektroprivreda Hrvatske zajednice Herceg Bosne“ dioničko društvo Mostar potrebnih za provođenje četvrtog tarifnog postupka. Istom odlukom, FERK je utvrdio kako su započeli postupci formalnih rasprava u četvrtom tarifnom postupku. Dana 23.12.2009. godine FERK je od Javnog poduzeća „Elektroprivreda Hrvatske zajednice Herceg Bosne“ dioničko društvo Mostar primio Zahtjev za odobrenje tarifa za djelatnost proizvodnje električne energije upisan pod brojem 07-02-1592/25/09, Zahtjev za odobrenje tarifa za djelatnost distribucije električne energije upisan pod brojem 07-02-1593/26/09 i prijedlog tarifnih stavova za nekvalifikovane (tarifne) kupce Javnog poduzeća „Elektroprivreda Hrvatske zajednice Herceg Bosne“ dioničko društvo Mostar. U skladu sa članovima 9. i 71. Pravilnika za tarifnu metodologiju i tarifne postupke, FERK je 24.02.2010. godine donio Odluku broj 07-02-1592-07/25/09 i 07-02-1593-07/26/09 o provođenju trećeg tarifnog postupka, kao i postupka formalnih rasprava.

FERK je, Odlukom broj 01-07-1311-16/09, 07-02-1592-08/25/09, 07-02-1593-08/26/09 i 01-07-198-03/10 od 24.02.2010. godine o planu aktivnosti na provođenju postupaka formalnih rasprava tokom trećeg i četvrtog tarifnog postupka, utvrdio plan aktivnosti na provođenju formalnih rasprava u trećem i četvrtom tarifnom postupku, među kojima i formalnu raspravu o tarifnim stavovima za nekvalifikovane (tarifne) kupce Javnog poduzeća „Elektroprivreda Hrvatske zajednice Herceg Bosne“ dioničko društvo Mostar, koje je isto dostavilo uz dokumentaciju potrebnu za provođenje trećeg i četvrtog tarifnog postupka.

Status umješača u postupku formalne rasprave o tarifnim stavovima za nekvalifikovane (tarifne) kupce su stekli „Aluminij“ d.d. Mostar Zaključkom broj 01-07-198-19/10 Udruga proizvođača i prerađivača aluminija – BiH Zaključkom broj 01-07-198-20/10, Udruženje za poduzetništvo i posao LINK Mostar Zaključkom broj 01-07-198-21/10, B.S.I. d.o.o. Jajce Zaključkom broj 01-07-198-22/10, Obrtnička komora Hercegovačko-neretvanske županije/kantona Zaključkom broj 01-07-198-23/10, Vlada Županije zapadnohercegovačke Zaključkom broj 01-07-198-24/10, FE-AL d.o.o. Mostar Zaključkom broj 01-07-198-25/10 i FEAL d.o.o. Široki Brijeg Zaključkom broj 01-07-198-26/10, koje je FERK donio 11.03.2010. godine. FERK je dana 06.04.2010. godine donio Zaključak

Regulatorna komisija za električnu energiju u Federaciji Bosne i Hercegovine – FERK

Blajburških žrtava 33, 88000 Mostar

Tel. /036/ 44 99 00, /036/ 44 99 01; Fax: /036/ 333-507, /036/ 333-508

[kontakt@ferk.ba](mailto:kontakt@ferk.ba) [www.ferk.ba](http://www.ferk.ba)

broj 01-07-198-51/10 kojim se odobrava Zahtjev za sticanje statusa umješača podnosioca Institucije Ombudsmana za zaštitu potrošača u BiH, u onom stanju u kojem ga zatiče prilikom stupanja u postupak iz razloga jer je Zahtjev za sticanje statusa umješača podnesen nakon isteka roka za podnošenje istog.

Postupajući po dostavljenoj dokumentaciji Javnog poduzeća „Elektroprivreda Hrvatske zajednice Herceg Bosne“ dioničko društvo Mostar u trećem i četvrtom tarifnom postupku, FERK je Rješenjem broj 07-02-1592-82/25/09 od 21.07.2010. Javnom poduzeću „Elektroprivreda Hrvatske zajednice Herceg Bosne“ dioničko društvo Mostar za obavljanje djelatnosti proizvodnje električne energije odobrio potreban godišnji prihod od nekvalifikovanih (tarifnih) kupaca u iznosu od 77.470.000 KM.

Rješenjem broj 07-02-1593-73/26/09 od 21.07.2010. FERK je Javnom poduzeću „Elektroprivreda Hrvatske zajednice Herceg Bosne“ dioničko društvo Mostar za obavljanje djelatnosti distribucije električne energije odobrio potreban prihod od tarifa za korisnike distributivnog sistema u iznosu od 54.162.000 KM i prihod za pokrivanje distributivnih gubitaka u iznosu od 14.659.364 KM.

Rješenjem broj 01-07-1311-91/09 od 21.07.2010. FERK je Javnom poduzeću „Elektroprivreda Hrvatske zajednice Herceg Bosne“ dioničko društvo Mostar za djelatnost snabdijevanja električnom energijom I. reda odobrio potreban godišnji prihod u iznosu od 14.763.893 KM. i trošak nabavke električne energije u iznosu od 103.800.001 KM, za nabavku 1.175,345 GWh električne energije.

Tarifni stavovi su utvrđeni alokacijom troškova proizvodnje, nabavke električne energije, troškova distribucije, te troškova snabdijevanja električnom energijom koje odobrava FERK, kao i troškova prenosa električne energije i rada NOS-a, uključujući troškove sekundarne i tercijarne regulacije koje odobrava DERK.

Tarifni stavovi za nekvalifikovane (tarifne) kupce zasnovani su na sljedećem:

- na troškovima proizvodnje i nabavke u iznosu od 179.341.706 KM, koji se dobije kada se odobreni potreban prihod proizvodnje i trošak nabavke u iznosu od 181.270.001 KM (za proizvodnju 77.470.000 KM, za nabavu 103.800.001 KM), umanje za 1.928.295 KM što predstavlja prenosne gubitke kvalifikovanih kupaca kojima je Javno poduzeće „Elektroprivreda Hrvatske zajednice Herceg Bosne“ dioničko društvo Mostar balansno odgovorna strana. Troškovi proizvodnje i nabavke u iznosu od 181.270.001 KM se odnose na troškove za pokrivanje potrošnje u iznosu od 159.249.450 KM, troškovi za pokrivanje gubitaka na prenosnoj mreži u iznosu od 5.893.186 KM od čega se 3.964.891 odnosi na nekvalifikovane (tarifne kupce), a 1.928.295 na kvalifikovane kupce kojima je Javno poduzeće „Elektroprivreda Hrvatske zajednice Herceg Bosne“ dioničko društvo Mostar balansno odgovorna strana (koji se dobiju primjenom tarife za pokrivanje prenosnih gubitaka koju je utvrdio DERK u iznosu od 0,1761 pf/kWh - Odluka DERK-a broj 04-28-5-348-79/09, „Službene novine Federacije BiH“ broj 28/10), na troškove za pokrivanje gubitaka na distributivnoj mreži u iznosu od 14.659.364 KM i za prekomjerno preuzetu reaktivnu električnu energiju u iznosu od 1.468.000 KM,
- na odobrenom potrebnom prihodu za djelatnost distribucije u iznosu od 54.162.000 KM,
- na odobrenom potrebnom prihodu za djelatnost snabdijevanja električnom energijom I. reda u iznosu od 14.763.893 KM,
- na pripadajućim troškovima prenosa za nekvalifikovane (tarifne) kupce u iznosu od 20.699.850 KM (koji se dobiju primjenom tarifa koje je utvrdio DERK i to prosječne

- prenosne mrežarine od 0,87 pf/kWh, prenosne mrežarine za snagu u iznosu od 1,478 KM/kW i prenosne mrežarine za energiju u iznosu od 0,566 pf/kWh – Odluka DERK-a broj 04-28-5-367-42/09, „Službene novine Federacije BiH“ broj 28/10),
- na troškovima za rad NOS-a u iznosu od 979.402 KM (koji se dobiju primjenom tarife za rad NOS-a koju je utvrdio DERK u iznosu od 0,0435 pf/kWh – Odluka DERK-a broj 04-28-5-348-78/09, „Službene novine Federacije BiH“ broj 28/10),
  - na troškovima sekundarne i tercijarne regulacije u iznosu od 4.791.192 KM (koji se dobiju primjenom tarife za sekundarnu i tercijarnu regulaciju koju je utvrdio DERK u iznosu od 0,2128 pf/kWh – Odluka DERK-a broj 04-28-5-348-79/09, „Službene novine Federacije BiH“ broj 28/10).

FERK je u razmatranju dostavljene dokumentacije u trećem i četvrtom tarifnom postupku u najvećoj mogućoj mjeri poštovao osnovna načela koja propisuju da će tarife biti pravedne i razumne, ravnopravne i određene na transparentan način, uvažavajući da postupnost u primjeni tarifne metodologije u prelaznom periodu podrazumijeva i postupnost u izmjenama tarifa, koje će tek na kraju prelaznog perioda, u potpunosti biti zasnovane na opravdanim troškovima, a sve u skladu sa odredbama Pravilnika za tarifnu metodologiju i tarifne postupke, koje se odnose na prelazni period.

Kako se može vidjeti u Pravilniku za tarifnu metodologiju i tarifne postupke u poglavlju o prelaznom periodu, politika FERK je da se elektroenergetski sektor mora kretati u pravcu tarifa koje pokrivaju opravdane troškove regulisanog preduzeća. Cilj je FERK-a da regulisana preduzeća rade na efikasan i ekonomičan način provodeći aktivnosti koje će prouzrokovati neophodne opravdane troškove i ostvarivati prihod po regulisanim tarifama.

FERK je u svom Pravilniku za tarifnu metodologiju i tarifne postupke zatražio da regulisana preduzeća posluju u skladu sa Zakonom o električnoj energiji. Kao što je propisano u članu 8. tog Zakona, u toku je otvaranje elektroenergetskog tržišta, a u skladu sa Ugovorom o uspostavi Energetske zajednice („Službeni glasnik BiH“ – međunarodni ugovori, br. 9/06), Odlukom o obimu, uslovima i vremenskom rasporedu otvaranja tržišta električne energije u Bosni i Hercegovini („Službene novine Federacije BiH“ broj 33/06 i 63/09) Državne regulatorne komisije za električnu energiju (DERK), te FERK-ovom Pravilniku o sticanju statusa kvalifikovanog kupca („Službene novine Federacije BiH“ broj 53/06). FERK nastoji da se subvencioniranje između različitih kategorija potrošnje svodi na najmanju moguću mjeru do njegovog konačnog ukidanja na kraju prelaznog perioda čemu u prilog govori smanjenje cijena električne energije ovom odlukom za kategorije potrošnje na 35 kV naponu (10,04%), 10 kV (5,07%) naponu i ostaloj potrošnji na 0,4 kV (3,14%). Implementiranje standarda nediskriminacije i obaveze javne usluge nametnute su od Parlamenta FBiH u obliku Zakona o električnoj energiji, što znači da sada postoje standardi koje FERK provodi u javnosti što rezultira nediskriminacijom i pravilnom raspodjelom troškova.

Važno je da Javno poduzeće „Elektroprivreda Hrvatske zajednice Herceg Bosne“ dioničko društvo Mostar, kao i cijeli sektor i javnost, razumiju kako su standardi koje FERK nameće elektroprivrednom društvu nastali primjenom zakona i sastoje se od ispitivanja i opravdavanja podataka o troškovima koje je prouzrokovalo regulisano preduzeće. FERK se ponaša u skladu sa zakonom; troškove je prouzrokovalo regulisano preduzeće prilikom svog poslovanja, tako da je isto dužno prikazati i opravdati te troškove u skladu sa članom 23., članom 30. i članom 37. Pravilnika za tarifnu metodologiju i tarifne postupke, a FERK u skladu sa članom 58. Poslovnika o radu FERK-a prilikom odlučivanja o opravdanosti nekog troška uzima u obzir i činjenicu da je informacija o istom data ili uskraćena.

Kada se radi o tarifama, dužnosti nezavisnog regulatora u skladu sa zakonom su verifikacija podataka o troškovima i postupno uvođenje promjena tarifa s ciljem potkrepljivanja tarifa zasnovanih na troškovima u skladu sa direktivama EU, Zakona i propisa koje donosi FERK. Regulisana preduzeća imaju obavezu pridržavati se propisa za snabdijevanje električnom energijom nekvalifikovanih (tarifnih) kupaca u skladu sa obavezom vršenja javne usluge.

Sva regulisana preduzeća koja imaju obavezu vršenja javne usluge moraju osigurati električnu energiju svim svojim nekvalifikovanim (tarifnim) kupcima što je moguće ekonomičnije. Ova obaveza ima svoje temelje u zakonu, a posebno:

- Dozvole za rad - licence za obavljanje elektroprivrednih djelatnosti dodijeljene Javnom poduzeću „Elektroprivreda Hrvatske zajednice Herceg Bosne“ dioničko društvo Mostar, sadrže obavezu vršenja javne usluge za Javno poduzeće „Elektroprivreda Hrvatske zajednice Herceg Bosne“ dioničko društvo Mostar opisanu u stavovima 4.2.1. i 4.1.1. tako da je imalac licence obavezan regulisane elektroprivredne djelatnosti obavljati kao javnu uslugu, kako je propisano važećim zakonima, podzakonskim aktima, propisima i pravilima FERK-a i u skladu sa direktivom EU i međunarodnim ugovorima koje je prihvatila BiH.

- Direktiva 2003/54/EZ vezana za zajednička pravila za unutarnja tržišta električne energije, u članu 3. opisuje obavezu javne usluge i dužnost preduzeća koje ima obavezu javne usluge da štiti svoje kupce. Posebno, formulacija navodi: „... U općem ekonomskom interesu, države članice mogu poduzetništvima koja djeluju u elektroenergetskom sektoru, nametnuti obavezu javne usluge koja je vezana za sigurnost, uključujući sigurnost snabdijevanja, redovitost, kvalitet i cijene snabdijevanja i zaštite okoline, uključujući i energetske efikasnost i klimatsku zaštitu.“

- Prema članu 4. Pravilnika za tarifnu metodologiju i tarifne postupke, obaveza javne usluge definisana je tako da „označava obavezu elektroenergetskih preduzeća da vrše izvjesne elektroenergetske djelatnosti kao javnu uslugu, prije svega vezano za sigurnost, redovitost, kvalitet, cijene snabdijevanja i zaštite okoline u skladu sa zakonom i direktivama EU.“

- Prema članu 5. Pravilnika za tarifnu metodologiju i tarifne postupke, ciljevi metodologije su da za tarifne kupce utvrde tarife koje su razumne i zasnovane na troškovima, zasnovane na uobičajenoj međunarodnoj praksi.

Obaveza javne usluge znači da elektroprivredno društvo mora raditi u općem ekonomskom interesu nekvalifikovanih (tarifnih) kupaca, prouzrokujući troškove koji su razumni i osnovani na uobičajenoj međunarodnoj praksi, što podrazumijeva planiranje i isporuku u korist kupaca.

Politika FERK-a je da elektroprivredno društvo treba hidroenergiju isporučiti nekvalifikovanim (tarifnim) kupcima, kao i da obavljanje trgovinske djelatnosti elektroprivrednog društva ne može biti u suprotnosti s obavezom vršenja javne usluge koja je elektroprivrednom društvu utvrđena u njegovoj dozvoli za rad.

Prilikom donošenja ove odluke FERK je vodio računa o sveobuhvatnom procesu reforme elektroenergetskog sektora u Bosni i Hercegovini, čiji je cilj ekonomski zdrav i održiv razvoj elektroenergetskog sektora. FERK je pošao i od činjenice da odluku donosi u prelaznom periodu, kada je u najvećoj mogućoj mjeri poštovao osnovna načela koja propisuju kako će tarife biti pravedne i razumne, ravnopravne i određene na transparentan način uvažavajući da postupnost u primjeni tarifne metodologije u prelaznom periodu podrazumijeva i postupnost u izmjenama tarifa koje će tek na kraju prelaznog perioda u potpunosti biti zasnovane na opravdanim troškovima, a sve u skladu sa odredbama Pravilnika za tarifnu metodologiju i tarifne postupke koje se odnose na

Regulatorna komisija za električnu energiju u Federaciji Bosne i Hercegovine – FERK

Blajburških žrtava 33, 88000 Mostar

Tel. /036/ 44 99 00, /036/ 44 99 01; Fax: /036/ 333-507, /036/ 333-508

[kontakt@ferk.ba](mailto:kontakt@ferk.ba) [www.ferk.ba](http://www.ferk.ba)

prelazni period. FERK smatra kako elektroprivredno društvo mora poslovati na efikasan i ekonomičan način provodeći aktivnosti koje će prouzrokovati neophodne opravdane troškove.

Na osnovu Rješenja broj 07-02-1592-82/25/09, Rješenja broj 07-02-1593-73/26/09 i Rješenja broj 01-07-1311-91/09, a u skladu sa odlukama Državne regulatorne komisije za električnu energiju - DERK broj 04-28-5-367-42/09, broj 04-28-5-348-78/09 i broj 04-28-5-348-79/09 od 27.04.2010. godine („Službene novine Federacije BiH“ broj 28/10), a slijedeći ciljeve kojima se FERK rukovodio, čije ostvarenje mu je povjerio Zakon o električnoj energiji, a pravila i propisi FERK-a, kao provedbeni akti navedenog Zakona potvrdili, odnosno vodeći se time da tarife trebaju biti razumne, ravnopravne i određene na transparentan način, kao i uvažavajući postupnost u eventualnim izmjenama tarifa, koje će tek na kraju prelaznog perioda u potpunosti biti zasnovane na opravdanim troškovima, te imajući u vidu sve specifične okolnosti koje postoje u elektroenergetskom sektoru i Federaciji Bosne i Hercegovine uopće, kao i to da je provođenje politike FERK-a u neposrednom odnosu s istim aktivnostima, FERK je odlučio kao u dispozitivu.

**PREDSJEDNIK FERK-a**  
**Zdenko Šimunović s.r.**